

Naginas subvenziuns per il permess dad ir cun auto

■ (anr/ac) La regenza grischuna na vul betg subvenziunar las stentas d'acquistar il premiss dad ir cun auto. Ella propona per quel motiv da refusar l'incumbensa dal deputà Tino Schneider (pcd Cuira). Il deputà ha argumentà sia pretensiun cun ils auts custs d'acquistar il permess gist per glied giuvna cun modestas entradas.

En la resposta sin l'incumbensa dal deputà Tino Schneider (pcd Cuira) scriva la regenza dad ina mancanza da la basa giuridica per contribuir als custs dad acquistà il permess dad ir cun auto. Concret a la scolaziun supplementara suenter che la manischunza u il manischunz han acquistà il permess cun l'examen dad ir cun auto. La scolaziun supplementara per ils novs manischunzs custa en il cantun Grischun tranter 680 e 770 francs, sco quai che Tino Schneider fa valair en sia incumbensa. El ha scrit dad auts custs per glied giuvna che sa chattia per gronda part en scolaziun e che possedia modestas perspectivas finanzialas. Il deputà ha visà en sias explicaziuns al chantun Fribourg che concedia ina contribuziun da 50 francs a la scolaziun supplementara per intimar ils automobilists che han gist acquistà il permess da frequentar la scolaziun uschè svelt sco pussaivel. Ina scolaziun ch'augmentia la segirezza sin via. En la resposta sin l'incumbensa Schneider e consegnants fa la regenza grischuna attent a las activitads tar la confederaziun che saja momentan londervi da surlavurar la scolaziun da duas fasas. La con-



Il deputà Tino Schneider (pcd Cuira) n'ha betg pudì persvader la regenza grischuna.

MAD

federaziun prevedia da reducir la scolaziun supplementara da dus sin in di uschia ch'ils custs per quela scolaziun vegnessian sme-sads. La regenza scriva vinavant dad esser pertscharta ch'i dettia en il chantun Grischun bleras personas che dovrian in auto per plirs motivs gist perquai ch'il traffic public na stettia betg dapertut a disposiziun da tuttas uras. La regenza è dal princip da l'avis ch'ì na saja betg l'incumbensa dal stadi da subvenziunar l'acquist dal permess d'auto. Ils custs da 680 enfin 770 francs valetescha ella per supportabels, cunzunt sch'els sa reduceschan en l'avegnir per la mesadad.